



KEMENTERIAN PERTANIAN DAN INDUSTRI MAKANAN

Ministry of Agriculture and Food Industries

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan
62624 PUTRAJAYA,
MALAYSIA

No. Telefon : 03-8000 8000
No. Faks : 03-8888 6020
Laman Web : www.mafi.gov.my

KENYATAAN MEDIA

**FLAG OFF IKLAN MASS RAPID TRANSIT (MRT) BAGI
PROGRAM PROMOSI DAN PUBLISITI MAHA 2022**

KAJANG, 15 JULAI 2022 – Kementerian Pertanian dan Industri Makanan (MAFI) telah melancarkan program promosi dan publisiti bagi *Malaysia Agriculture, Horticulture and Agrotourism* atau lebih dikenali sebagai MAHA edisi tahun 2022 di laluan MRT Sungai Buloh ke Kajang hari ini.

Majlis yang telah disempurnakan oleh YB Menteri Pertanian dan Industri Makanan (MAFI), Datuk Seri Dr. Ronald Kiandee dalam satu sesi flag off merupakan sebahagian daripada aktiviti MAFI bagi mempromosi MAHA 2022.

“MAHA 2022 merupakan pameran pertanian terbesar dan berprestij yang akan menampilkan pelbagai produk baharu berkaitan pertanian yang bersandarkan kepada teknologi terkini, inovasi-inovasi tempatan dan luar negara, strategi-strategi pemasaran dan pengeluaran secara efektif serta lain-lain pendekatan yang mampu membantu sektor tersebut,” ujar beliau.

Bertemakan “Sekuriti Makanan Untuk Masa Depan” atau “*Food Security for the Future*”, MAHA 2022 yang diadakan secara dwi-tahunan ini walaupun secara khusus adalah mengenai pertanian, hortikultur dan agro-pelancongan, ianya telah berkembang sehingga menjadi sebahagian dari landskap negara yang mempamerkan kemajuan serta pencapaian Malaysia.

Antara objektif MAHA yang disasarkan, termasuk:

- Aktiviti pepadanan perniagaan (*business matching*);
- Mempamerkan teknologi dan inovasi terbaharu dalam bidang agromakanan;
- Menjelaskan hala tuju dan menyediakan platform untuk perkembangan perniagaan dalam dan luar negara;
- Menggalakkan penglibatan generasi muda menceburi bidang perniagaan pertanian;
- Memartabatkan MAHA sebagai pameran perdagangan pertanian yang terunggul dengan menarik penyertaan syarikat-syarikat korporat dan pemain industri; dan
- Memberi dorongan dan meraikan barisan hadapan sektor agromakanan yang merangkumi golongan peladang, penternak dan nelayan serta pengusaha agromakanan di sepanjang rantai nilai.

Di samping itu, MAHA 2022 juga memberi penekanan kepada acara perdagangan dan perniagaan bagi menggalakkan penyertaan syarikat-syarikat swasta dalam dan luar negara. Malah bagi mengimbangi daya tarikan pengunjung, MAHA 2022 akan diselitkan juga dengan Program Hari Peladang, Penternak dan Nelayan Kebangsaan (HPPNK) melalui aktiviti pameran hasil dan produk pertanian oleh peladang, penternak, nelayan dan usahawan tani.

MAHA 2022 dijangka akan menarik seramai 100,000 orang pengunjung sehari secara purata dengan jangkauan sasaran lebih daripada RM250 juta potensi nilai jualan termasuk padanan perniagaan.

Laluan MRT Kajang dipilih kerana laluan ini mempunyai sebanyak 29 buah stesen, dengan jumlah sebanyak 58 buah MRT, dan juga 25 buah pasaraya berdekatan di sepanjang laluan.

MAHA 2022 ini akan menjadi indikator utama dalam usaha kerajaan melalui MAFI memacu pemulihan sektor pertanian dan agromakanan negara selain membantu usahawan tani untuk pulih dan menjamin sekuriti makanan negara.

MAHA 2022 akan diadakan pada **4 hingga 14 Ogos 2022** bertempat di **Taman Ekspo Pertanian Malaysia Serdang (MAEPS), Selangor**. Untuk maklumat lanjut mengenai aktiviti dan pameran, sila layari <https://mahaexpo.my/>

Turut hadir, YB Datuk Seri Haji Ahmad bin Hamzah, Timbalan Menteri Pertanian Dan Industri Makanan I, YB Datuk Dr. Nik Muhammad Zawawi Haji Salleh, Timbalan Menteri Pertanian Dan Industri Makanan II, Datuk Mohd Zarif Hashim, CEO MRT Corp dan barisan pengurusan tertinggi MAFI.

KEMENTERIAN PERTANIAN DAN INDUSTRI MAKANAN
15 JULAI 2022